

LA USC DI LADINS – VENERDI' 13 GENNAIO 2017

I Trei Rees à viajà te duta Fascia

Se à renovà enche chest an la veiora tradizion di ciantores de la steila



I gropes de Rees da Pera, Poza e Soraga, con I piovan don Andrea.



I doi gropes de ciantores de la steila de Soraga.



I Trei Rees de Ciampedel te anter la doi pèstres.



Matteo, Enrico e Mattia, i Trei Rees de Cianacei.



Silvia, Caterina e Kate da Dèlba.

Tradizioni - I è rué a la fin de sie lonch viaci Re Magi. Dò aer tant viajà, te la seres freides e tumies, cèsa per cèsa, a portèr la bona noela, en Pèscà Tofènia i à strutà sù sie mandat.

N mandat che ge era stat consegnà dal Piscop de Trent Monsignor Lauro Tisi ai 27 de dezerber tel Dom de Trent al grop de Re Magi da Soraga, che simbolicamente l'ha tout sù con gaissa e empena a inom de duc i gropes de Fascia. "I è verjeve ai etres" ge aea dit I Piscop Tisi, i encianian un per un a se fèr portaus del gran miracol. E còscita, enche aldò de la tradizion de nesc veies, che ge à semper tegnù a tramanèr l'gust e la miscion di ciantores de la steila, sche te ogne paìse se à metù ensema un o doi gropes de Rees, compagné zaola enche dai pèstres, e i è jic fora per duta la cèses e i alberghes fin da Pèscà Tofènia.

Te vèlch paìse à didà la catechistes, te tres vèlch volontadiva, ti paiges de Moena e de Poza l'è stat enche n grop de gregn che se à metù ensema; i à vardà de trèr cà i guanc più bie e preziozes, la coronas, la cedeneles, i scrignes, percheche i Trei Rees, enche se chiò entorn magari mingol più pure, l'era pa semper rees.

I di de Pèscà Tofènia, en ocagion de la giornèda de "l'infanzia missionaria", I piovan don Andrea Malfatti l'ha envià duc i bec de sia parochies per na funzion te geija de Pera. Chiò dintorn utèr l'era enche i gropes de Re Magi da Pera, Poza e Soraga, mencea chi de Vich e Mazin, che no è stac bogn de se endrezèr.

"Desche i magi che se à metù en moviment, còscita enche a nos ne vegn domanà de meter en azion I cher,

sorjan nosc temp, noscia amicizia, noscia capazitèdes", l'ha dit don Andrea.

A la fin de la funzion, che è stac animèda con la bela cianties del cor, de bec de Pera e coi bie simboi enjigné da la monies de Poza, don Andrea à presentà i gropes de Rees e un per un i à portà dant sia ciantia con gran braura.

I Trei Rees de Fascia à portà te noscia val la bela noela, i à viajà per monc e per val per ruèr a veder olache l'è nasciù I Messia. Te si viajes i à tout sù bonamans che jirà per l'ativitèdes miscionères e de la parochies. (mci)

Doi gropes de Rees a Soraga

"Siede i più potenc" ge à dit I Piscop Tisi te n oreia canche i è jic a Trent a ciapèr l'mandat. E chest compliment ge à dat forza e gaissa a Michele, Patrick, Vanessa, Arianna, Chiara e Samuele, didè enche da Giorgia, che chest an à fat i Trei Rees a Soraga. I è stac endrezè da la catechistes Carmen, Silvia e Cristina e per cinch seres i è jic fora per duta la cèses e i hotie de paìse. En Pèscà Tofènia i se à troà te piazz Ciock tedant a la gran cripela a ciantèr ensema al Coro Nosc e en dut i è stac bogn de binèr sù per la miscions e la parochia passa 3000 euro.

A Poza picoi e gregn Rees e Reines cianta per fascian

A Poza la tradizion di Trei Rees va inant de grazia a l'empena de vèlch mère che se met a la leta per enjigné, "enfroignèr" e regolèr bec e bezes che à gust de jir stroz co la steila.

Chest an didè da Fernanda e Raffaella i era de n bon schiap i picioi che se enterzè jan a ciantèr con gran braura fora per dut l paìse de Poza, per talian o per ladin, aldò de chi che i jia a troèr. L'era Daniele, Damiano, Gabriele, Francesco, Daniele, Nicolò, Francesco, Giulian e Anna.

Chef che i à binà sù de scioldi l'è stat dat desche semper per la miscions e per chi che à de besegn.

Semper per fins de solidarietà, spartit anter projec de miscions e per i teremotè del zenter de la Tèlia, l'è stat tout sù passa mile euro enche da tre i joenotes de 15 egn. Gloria, Rebecca e Sabrina. Eles è jites no demò a Poza, ma enche a Vich, ajache i ge à domanà de jir enche te vèlch majon e hotel de chest paìse, e i à abù dassen gran gust de scutèr sia ciantia, tant per talian che per ladin.

Ma a Poza apede ai bec se à podù veder e scutèr enche n grop de Rees gregn: Roberto, David e Thomas i se l'ha pissèda l'an passà delate dal grop di Bontemponi, de jir a fèr i Trei Rees; i se à binà ensema la ciantia ladina con la paroles de P. Frumenzio e Martin e Pia ge à enjigné i guanc. Chest an i à domanà l'aiut enche de doi pèstres, Vincenzo e Leonardo, per poder ciantèr a più oujes coche carenea e jir còscita a ge portèr mingol de legreja soraldut a la jent de età, tant te Cèsa de paussa che te sia majons.

Enche a Pera l'era Trei Reines

L'è stat na bela esperienza enche per Gloria, Elisa e Emma, che didèdes vèlch outa enche da l'lenia les è jites

fora per la majons de Pera, Moncion e Mazin. Per ruèr daperdud più sorl, fossa bel che n auter an posse se meter ensema n auter grop per se spartir mingol i percors, ampò, encheben che soraldut vèlch di sie stat dalbon n muie freit, a la sodesfazione de jir a ciantèr con la steila se à jontà la legreja de se trèr ite i guanc, dassen n muie bie, enjigné da Bernardetta.

A Ciampedel ensema ai pèstres

A Ciampedel a jir a fèr i Trei Rees l'è stat Leonardo Riz, Gregor Löwe e Mattia Lazzar. Ensema a ic l'è enche doi valenta pèstres, Miriam e Elisa Lazzar. Enche chest an l'grop de rees e pèstres i à abù n bon da fèr a jir fora per la cèses de duta la jent de paìse sora i 70 egn. Apede dapò i à vardà enche de jir fora per i hotie per tor sù la bonamans che va dutes al grop de la jent de età de Comun, che l'è tegn sù ogne an la tradizion di Trei Rees.

N bel moment per duta la comunanza l'è stat canche dò la messa de Pèscà Tofènia, en vender ai 6 da les 6 da sera, i Trei Rees i à spetà i fidei fora da geija e i à ciantà per la jent. Chela medema di i è stac enche a fèr vijita a la cripela ladina de Teodoro Rizzi te Piazz de Ciampedel olache, aldò de la tradizion, l'è stat fumentà.

I Trei Rees è jic stroz enche a Cianacei e Gries

I era proprio de trei chest an i Re Magi che sot la festes è jic fora per la cèses e i alberghes de Cianacei e Gries a portèr la bona noela. La tradizion

è stata vivendà da Matteo Riz, Enrico Bernard e Mattia Valentini che con sia gran steila i à viajà en lonch e en lèrch. I di de Pèscà Tofènia i è stac enche te geija de Cianacei olache don Mario Bravin à endrezà la benediscion de duc i bec e na picola sopresa.

Ta Dèlba e Penia Trei picola Reines

Se pel dir che ta Dèlba chest an l'era Trei Reines enche te Trei Rees ajache l'era dutes tre bezes: Caterina De Pinto, Kate Rizzi e Silvia Piazz. Enche eles desche l'grop da Cianacei les è jites fora per la cèses e ti hotie de Dèlba e Penia e duta la bonamans toutes sù les vegn metudes per i bec de la Bielorusia che vegn vigni an te desvaliva families del Comun de Cianacei e te Fascia.

Gregn e picoi à portà la steila a Moena

A Moena da egn i Trei Rees va stroz per endrez e col sostegn del Grop miscionarie, e chel che i tol sù l'èrf apontin per didèr i più pure de la tera. Enche chest an l'era n grop de gregn e un de picoi, i gregn l'era Sisto, Gianni, Nicola, Marco, Luca (coi pèstres Samuele e Stefano) e i picoi l'era Irene, Gemma, Alice, Marianna (coi pèstres Francesco e Maria Chiara) e a i menèr stroz l'era Stefania e Daria.

Chisc ciantores i ciapa l'mandat da don Enrico de jir a anzunzièr ofizialmenter che l'Bambin è nasciù, i va stroz per i hotie, i tol pèrt a la zerimonia de la benediscion di bec e i va a troèr la jent de età, che l'è semper gran gust de i scutèr.



La Trei Reines da Poza: enche chesta tradizion se à oramai ori a la eles. Apede i Rees gregn da Poza se à enjigné con braura la ciantia con la paroles de P. Frumenzio. Te la terza foto: a Moena l'è jic stroz doi gropes de Rees, i picoi e i gregn, compagné enche dai pèstres.